

Tamsalt n usismel n tewwura deg yisegzawalen n tmaziyt

1. Asismel ilmend n ugemmay

D asismel n tewwura ilmend n wakken msedfaren yisekkilen n ugemmay. Ayen yelhan deg-s d asishel n unadi akked tfin n wawalen. Ayen ur nelhi dakken, i) deg tmaziyt ulac asemsawi n umdan n tewwura gar yixfawen n usegzawal (a, u, i ad ččaren nezzeh, ta, tu, ti ad ččaren nezzeh), ii) yettili d ssebba n beṭṭu (afraq) n wawalen yesɛan yiwen n uẓar (ccef/sucef ad ferqen, bedd/ibeddi/addud ad ferqen, axxam/taxxamt ad ferqen, ...)

2. Asismel ilmend n uẓar n wawal

D asismel n yizuran n wawalen ilmend n ugemmay. Ayen yelhan deg tarrayt-a d asdakal deg usegzawal n wayen yellan yeddukel deg tutlayt (asdakel n twacult n wawalen i d-yekkan seg yiwen n uẓar). Ma d ayen ur nelhi ara dakken, i) deg usemres ney deg unadi, tiwwura d izuran-nni s timmad-n sen mačči d ayen nessexdam deg yinaw acku win ara inadin deg-s ilaq ad d-yaf aẓar-nni send ad yaweḍ yer wawal i yettnadi, ii) yuɛer yef yimseqdec akken ad d-yaf aẓar n wawal acku d ayen yuhwaḡen timusniwin n tesnilest, iii) asuget n yizuran iynismen (aṭas n wawalen ara naf kkan-d seg yiwen n uẓar maca d talya kan, inumak mgaraden) ; amedya, deg Dallet (1982) ad naf 26 n yizuran s talya L. Ilaq ad nyer akk awalen i d-yekkan seg-sen akken ad d-naf awal i nettnadi, iv) abeddel n uẓar deg tutlayt (ffey/tawafya = w, annar/inurar = Nr/nR, aksum/aysum = k/y, iyzif/teyzi = yzf/yz,...), v) awalen ireṭṭalen seg tutlayin n umalu (Lurup) ur bnin ara yef uẓar (ṭṭabla = TBL ?, amikru = MKR ?), wid i d-yekkan seg taɛrabt sean ugur n l n tazwara (lefhamma = LFHM ney FHM), tikwal yerna yur-s wugur n t n taggara (lḡennet = LḡNT ney ḠNT ney ḠN), ...

3. Asismel ilmend n ufeggag

Ad t-naf yer Oussikoum (1995), Azdoud (1997), Bouamara (2010 d 2017), Haddadou (2014). Ad nemmeslay yef wamek i tettusemres deg usegzawal n Bouamara Issin (2010 d 2017) : isem amalay ad as-nekkes tiyri tamezwarut, isem unti ad as-nekkes ticreḍt n wunti d teyri tamezwarut, amyag, ma ibeddu s teyri ad as-tt-nekkes ; syin ad yili usismel ilmend n wayen i d-yeqqimen (targalt tamezwarut n ufeggag). Ayen yelhan deg-s : i) yeshel yef yimseqdec akken ad d-yaf afeggag, ii) yessishil asexdem n usegzawal (mačči am usismel s uẓar), iii) yesdukul ayen yedduklen deg tutlayt, tiwaculin n wawalen (mačči am usismel s ugemmay). Ayen ur nelhi ara : i) mačči awalen akk tesdukel twacult ad daklen deg usegzawal-a (ečč/ttwečč, ssečč, mmečč, myečč) wi akk mfaraqen, ii) tugna n wawal, d tin i d tumast-is, texreb (afus = fus, tameṭṭut = meṭṭut, argaz = rgaz, ...)